




25

GENERALIA  
D E  
**HAEMORRHAGIIS.**  
DISSERTATIO  
INAUGURALIS MEDICA,  
QUAM AB  
INCLYTA FACULTATE MEDICA PESTIENSI  
APPROBATAM  
PRO  
DOCTORIS MEDICINAE LAUREA  
OBTINENDA

PUBLICAE ERUDITORUM DISQUISITIONI SUBMITTIT

**LJUBOMIR RADIVOJEVICS,**  
SERBUS KAMENICZIO-SYRMIENSIS.



Theses adnexae defendentur in palatio universitatis minori. mensis  
Novembris die                      an. 1846.

---

PESTINI,  
TYPIS JOSEPHI BEIMEL.  
1846.



НЪГОВОМЪ ВЫСОКОРОДІЮ,  
КНЯЖЕСКО-СРБСКОГЪ СОВѢТА  
ПРЕДСѢДАТЕЛЮ  
И  
КАВАЛЪРУ,  
ГОСПОДИНУ  
СТОЯНУ СИМИЊУ,

**КАО СВОМЕ ПРЕМИЛОСТИВОМЪ**  
**БЛАГОДѢТЕЛЮ**  
**ИЗЪ**  
**СВЕСРДНОГЪ ВЫСОКОПОЧИТАНІЯ**  
**И**  
**БЛАГОДАРНОСТИ**

посвећує  
**САЧИНТЕЛЬ.**

Sanguine e vase suo egresso haemorrhagiam  
(кровоизлитіе, Blutung) adesse dicimus.

Ratione causarum distingvimus haemorrhagias mechanicas et spontaneas: *mechanicae* sunt illae, quae obtinent, dum vasa sangvifera per vires mechanicas *externas* sauciantur; *spontanearum* vero haemorrhagiarum causae saltem maxima ex parte sunt vires *ipsius organismi*. De spontaneis hisce haemorrhagiis nobis hic loci praeprimis sermo erit.

Haemorrhagiis solum genus humanum obnoxium est, cujus rei in anatomia comparativa mammalium, spectato systemate vasorum sangviferorum sufficientem rationem non deprehendimus. — Quaedam organa prae aliis in haemorrhagias magis proclivia sunt; adjuncta quae id efficiunt, procul dubio sunt sequentia: vitalitas organi eminentior, copia vasorum sangviferorum in eodem major, functio ejus secretoria texturaque laxa. — Ratione organorum in quibus haemorrhagiae obveniunt, sequentes sunt praecipuae earum species; epistatis, stomatorrhagia, haematemesis, haemoptoe, pneumonorrhagia, metrorrhagia, fluxus catamenialis, haematuria, apoplexia; ex his unicus fluxus catamenialis ad functiones organismi humani normales spectat, reliquae vero omnes pathologicae sunt.

Haemorrhagiis semper aliae aliquae adfectiones morbosae, ut plurimum congestiones et infarctus subsunt; sed non raro primariae hae adfectiones longe minoris sunt momenti, quam ipsae ab iis dependentes haemorrhagiae, atque in tali casu, neglecto proprio illo morbo primario, haemaemorrhagia pro tali est ha-



benda, sicut v. c. in haemoptoe orta e physconia hepatis, vel in apoplexia, cujus causa proxima est vomitus, remotior vero gastricismus, id locum habet.

Per haemorrhagias aut *purus*, aut aliis materiis *mixtus* sanguis egeritur; solet autem haemorrhagicus sanguis misceri sero, muco, puri, ichori, succis primarum viarum, omnibusque aliis fluidis aut fluido — mollibus, quae ei momento effusionis, aut dum is foras petit, obvia fiunt. — Extravasatus sanguis nonnunquam ruber, alias niger est: *ruber* color semper sangvinis ex arteria effusionem indicat; *niger* vero est semper sanguis venosus, sed etiam arteriosus talis evadit, si extravasatum, antequam foras penetrasset, diu intra organismum haeserat, ubi interea desoxydabatur. — Sangvinis haemorrhagici puri longiori intra organismum commoratione etiam id efficitur, ut extravasatum *coaguletur*; coagulari autem non potest sanguis, qui mox post effusionem muco, sero, aut aliis heterogeneis commiscetur; sicut et in extravasatis quamvis pure sanguineis multarum passivarum haemorrhagiarum, ob crasim sangvinis id secum ferentem, coagula aegerrime formantur.

*Quantitas* sangvinis, uno insultu haemorrhagico eveci diversissima esse solet; meminerit autem medicus, eam praecipue in haemoptoe et haematemesi vix non semper esse multo minorem, quam ab aegris perhibetur, rarissimi enim aegri sunt, qui viso sanguine, per tussim aut vomitum ejecto, magno non percellerentur metu, ob quem deinde quantitatem sanguinis exspati nunquam non majoris aestimant, quam fas est. — *Effectus* cujusvis aliquantum notabilioris quantitatis sangvinis per haemorrhagiam amissi alius est, si haemorrhagia praeceps, et alius, si ea lenta fuerat.

*Duratio* quoque haemorrhagiarum nimio opere variat: ea nonnunquam aliquot minuta prima vel horas non excedit, alias in dies et menses, imo etiam annos, licet non continua, protrahitur. — Notatu dignus

est nisus haemorrhagiarum in *recidivas*, qui tantus est, ut vix reperias hominem, qui sua vita unica tantum vice haemorrhagia laborasset. Haemorrhagiae, dum redeunt, vel eadem ut olim, vel alia invadunt organa. Praecipua redeuntium haemorrhagiarum causa procul dubio posita est in eo, quod morbi earum subjectivi raro mox post primum insultum haemorrhagicum ex integro sufferantur.

*Modi*, quibus sanguinis egressui e vasis via panditur, sunt: a) *rhetis*, i. e. ruptura vasis; b) *diabrosis*, dum vasa pure aut ichore quodammodo exeduntur; c) *diapedesis*, haec est species transsudationis, sub qua sanguis per parietes vasorum, quin ii saucientur, penetrat.

### Diagnosis.

Sanguine in conspectum veniente nullum superest dubium, quod haemorrhagia adsit, atque hoc in casu diagnosis nullis premitur difficultatibus; dicitur talis haemorrhagia *externa*. Sed non tam facili negotio cognosci possunt haemorrhagiae *internae*, i. e. sanguinis effusiones in loca talia, e quibus is per vias naturales in lucem prodire non potest. Ad has cognoscendas deducimur pluribus, iisque pro diversitate loci, temperamenti, habitus, aetatis, sexus etc. diversissimis symptomatibus pathologicis, quorum praecipua sunt: tumor jam major jam minor, qui nonnunquam adeo celeriter increscit, ut subito exortus esse videatur, turbata functio organi, in quo talis tumor sedem suam habet, in eadem plaga sensus aucti caloris, sensus pressionis in organa contigua, eorundemque organorum turbatae functiones; sympathicae adfectiones organorum dissitorum, uti: cutis pallor, depressa temperatura et siccitas, venarum per eam transparentium tenuitas, lotius corporis collapsus, illusiones sensuum externorum, lipothymiae, arteriarum pulsus debilis irregularisque.



Postquam medicus haemorrhagiam cognovisset, omnes ingenii sui nervos intendat, ut *characterem* quoque morbi eruat, qui vel activus vel passivus esse solet:

*Activae* haemorrhagiae aggrediuntur subjecta ut plurimum in aetate juvenili et virili constituta in genere prospera valetudine, praecipue vero sanguine, globulinae magna copia referto, gaudentia. In iisdem hisce subjectis *proclivitas* in haemorrhagias activas nimio opere exaltatur per adjuncta plethorae faventia. *Causae occasionales* consvetae sunt: omnes corporis adstrictiones nixui junctae, motus activi, vehementes animi affectus, et ipsae causae praedisponentes magno in gradu evolutae. Haemorrhagias activas praecedere solent quaedam symptomata, quorum summa efficit sic dicta *molimina haemorrhagica*; haec sunt: coenaesthesia alienatio, dolores inconstantes vagi, qui sensim sensimque concurrunt et coucentrantur in organo, in quo haemorrhagia locum habitura est; in eodem organo obscurus quidam pressionis, tensionis aut titillationis, aetique caloris sensus, nonnunquam horripilationes et horrores aegram perstringunt, extremitatesque frigore corripuntur, nec absunt palpitationes cordis cum anxietate praecordiali, pulsuque arteriarum suppresso, duro, dicoto. Haec circiter sunt prodroma haemorrhagiarum activarum, tamquam molimina sanguinis propria vi e vase suo prorumpere nitentis. Posteaquam vero is prorupit, nisi apoplexia aut suffocatio vitae finem imponat, in locum priorum sequentia succedunt phaenomena: ea ratione, qua sanguis effunditur, disappearant indicia localis congestionis, dolores evanescent, calor aequabilis per totum corpus distribuitur, cordi et arteriis debitus rhythmus restituitur, reditque sensim gratus restauratarum virium et melioris valetudinis sensus. Haec est morbi facies tandiu, quamdiu per magnam sanguinis jacturam signa anaemiae non provocantur. Ad cognoscendum activum haemorrhagiae

cujuspiam characterem confert etiam indoles sanguinis, qui sit ruber, plasticus, post coagulationem dans placentam magnam, firmam, serumque limpidum, et cum quadam vi stillet ex organo unico. Haemorrhagiae vicariae et criticae hunc characterem prae se ferre solent.

*Passiva* e contra haemorrhagiae invadunt subjecta in genere debilia, omnium textuum organicorum, imprimis vero vasorum laxitate et sanguinis serosa aut plane septica crasi insignia. Eae, quin per aliquam notabilem causam occasionalem invitentur, potissimum sponte ingruunt, absque praecedentibus moliminibus haemorrhagicis, et etiam absque inducto vel minimo levamine, quin imo lapsus virium pari passu cum jactura sanguinis continuo incedit, et nisi haemorrhagia mox sistatur, signa anaemiae, sequuntur. Sanguis talium haemorrhagiarum est saepissime niger, serosus, in dissolutionem pronissimus, coagula in eo difficulter formantur, cum placenta parva, molli, seroque turbido; saepe eodem tempore pluribus e locis sanguis manat.

Multum tamen abest, ut de singulis quibusvis haemorrhagiis cum certitudine dici possit, ad quam e dictis duabus speciebus ea pertineat, cum in multis casibus nec notabilis gradus augmentum, nec vero lapsus virium haemorrhagias comitetur, neque alia ex adductis distinctivis activarum et passivarum haemorrhagiarum signis justo numero manifeste adsint, ut id de epistati quotidiana experientia testatur.

### Aetiologia.

*Disponuntur* in haemorrhagias organismi, in quibus systema vasorum inter caetera magis est evolutum, praeterea, quorum sanguis globulina aut absolute aut relate ad fibrinam justo magis abundat, item quorum solidomollia, praeprimis vero vasa, textura laxa, et humores visu in dissolutionem insigniuntur; hinc se-

xus sequior, temperamentum sanguineum, habitus apoplecticus, phthisicus, et scrofulosus, flosque aetatis homines prae aliis in haemorrhagias magis proclives reddunt; haereditaria quoque dispositio in quasdam haemorrhagiarum species, praecipue in haemoptoem et metrorrhagiam, apoplexiamque est observata. Singulari ratione aetas puerilis in epistatim, juvenilis in haemorrhagias pulmonales, virilis in eas organorum cavi abdominalis, et senilis in apoplexiam nituntur.

Praesente dispositione origini haemorrhagiarum *ansam* dant 1. Omnia ea, quae quantitatem et expansionem sanguinis augent, circulationemque ejus celeriore reddunt; huc spectant: nutrimenta et potulenta abunde nutrientia et stimulantia, medicamenta quoque e classe diversimode stimulantium et roborantium, item omnes diaetetici hujus generis influxus, vehementesque animi affectus. 2. Quae sanguinis circulationi impedimento sunt, uti: topicae habituales congestiones aut stases, infarctus viscerum, vitia organica cordis et pulmonum, uti: insufficientiae et stenoses valvularum cordis, ejus ventriculorum hypertrophiae, emphysema pulmonum etc.; quaedam vestimentorum genera corpus alicubi constringentia, uti collipendia, diversaque alia cingula; magna virium adstrictio per diuturnum et vehementem motum, difficiles labores, nixum, cantum etc. 3. Diversarum naturalium aut vero consuetarum secretionum et evacuationum justo major parcitas, sive plenaria vel saltem diuturnior quam secus emansio, cujus originis haemorrhagiae *vicariarum* functionum instar habendae sunt. 4. Subita mutatio ponderis in medio ambiente, celeresque caloris et frigoris vicissitudines; hac ex causa vere et autumnino haemorrhagiae frequentes sunt. 5. Nonnunquam haemorrhagiae invitantur per diversos morbos in congestionem vel inflammationem fundatos, quorum vis deinde plus minus frangitur; haemorrhagiae tales *criticae* audiunt.



Sunt quoque haemorrhagiae, quae dependent a latente febris intermittente, ejusque larvam constituunt; tales haemorrhagiae typum febrihus intermittentibus familiarem sequuntur.

### Decursus et Prognosis.

Singuli insultus haemorrhagici morborum acutorum vel et acutissimorum instar cyclum suum brevi absolvunt tempore, diuturnus attamen nisus haemorrhagiarum in recidivas saepissime remanet. Sopitum insultum haemorrhagicum excipit vel sanitatis in integrum restitutio, vel anaemia et nonnulli morbi posthumi, vel denique ipsa mors.

1) Sanitas sequetur, si cessante sanguinis effusione, topicae quoque congestionis et plethorae indicia cum reliquis morbosus symptomatibus, quae haemorrhagiam praecesserant vel comitabantur, sensim sensimque disparuerint, grataque coenaesthesia pedetentim redeat. Hunc faustum terminum sperare licet, si haemorrhagia locum non habuit in nobili aliquo organo, praeterea in haemorrhagiis passivis, si eae simul cum congestionem locali quo ocyus sufferri possint; in activis vero haemorrhagiis, si eae justum non egrediantur litem, justus tamen hic limes nequaquam sola sanguinis profusi quantitate, sed etiam celeritate, qua is evacuebatur, et statu virium organismi totius definitur.

2) Anaemia facile inducitur per haemorrhagias passivas, per activas autem tantum tunc, si eae nimiae forent. Signa anaemiae sunt; sensus lassitudinis universum corpus occupans, lipothymiae etiam exiguis corporis commotionibus provocandae, cutis pallida, arida, collapsa, artus frigescens, venae tenues, rubicundae, lingua pallida, sicca, sitis vehemens, post ingestos cibos crebri ructus, sensus nimiae impletionis et pressionis in regione epigastrica, noctes insomnes aut cum deliriis placidis, erethismus totius corporis,

praeprimis vero vasorum sangviferorum pulsu frequenti, parvo, debili, filiformi, caloribus fugacibus quam maxime vero strepitu sic dicto diaboli in arteriis carotidibus cognoscendo.

Morbi posthumi consveti sunt: a) inflammationes circumscriptae in circumferentia loci, e quo sangvis prorupit, aut circa enatum extravasatum; b) intumescen-tiae hydropicae plus minus diffusae, a sangvinis indole venosa reddita repetendae; c) denique producta dyscrasica calhexiarum in organismo profunde radicalarum, velut: tubercula post haemoptysin, scirrhus uteri post metrorrhagias, calculi urinarii, post haematuriam.

3) Denique ad mortem quoque haemorrhagiae ducere possunt. Infaustum hunc terminum haemorrhagiae ut plurimum sequentibus tribus sortiuntur modis: a) si eae nobile quodpiam organon invadant; b) si per eas corpori necessaria ad vitam sangvinis quantitas subtrahatur, quo in casu mors cum convulsionibus et insultibus lipothymicis accedit; c) medio productorum dyscrasicorum.

E dictis ultro sequitur, a nonnullis haemorrhagiis bona exspectanda, ab aliis vero mala, imo e pos-sima metuenda esse. Praecipuae bonae spei conditiones sunt: minor gradus praegressae congestionis et subsequen-tae sangvinis effussionis, minor numerus insultuum haemorrhagicorum, absentia symptomatum periculorum, indoles morbi vicaria aut critica et character activus, focus morbi superficiei corporis vicinior, dignitas organi affecti minor, aetas individui juvenilis aut virilis, crasis sangvinis bona et in genere constitutio totius corporis satis laudabilis. Quo magis adjuncta morbi et individui a dictis abluserint, eo infaustior prognosis ferenda erit.



## Therapia.

Curatio haemorrhagiarum multis obnoxia est varietatibus, imprimis pro diversitate morbi stadii, characteris, loci et causarum.

Si morbus adhuc in *stadio moliminum* versatur, ad praeventendam ipsam sanguinis eruptionem ordinabimus: ut situs aegro talis concilietur, in quo pars, e qua sanguis prorumpere nititur, quantum fieri potest, altissimum occupet locum, ut totius corporis, imprimis vero partis adfectae commotio omnisque adstrictio sollicite vitetur, ut solvantur vestimenta ab eadem parte refluxum sanguinis impediencia; aer aegrum ambiens sit tantisper frigidus, victus frugalis cum aliquantum largiori usu aquae frigidae purae, vel saccharatae addita parva quantitate aceti, vini, succi citri, pomorum aurantiorum, rubi idaei, acidi tartarici. Haec saepe sufficiunt sopiendis levibus moliminibus haemorrhagicis; quodsi autem ob majorem morbi gradum non sufficerent, nitrum cum vel sine digitali purpurea, nec non purgantia antiphlogistica, uti: cremor tartari, sal Glauberi, arcanum duplicatum etc. in auxilium vocanda sunt; nonnunquam plethora et congestio notabilior ad organon quodpiam nobile ipsam venaesectionem necessariam reddunt.

Si *haemorrhagia* jam praesto est, ante omnia in characterem ejus indagandum.

Si character haemorrhagiae *activus* fuerit, ordinatis illico iis, quae sub minoris gradus moliminibus commendavimus, ulteriorem medelam aliam instituemus si haemorrhagia *moderata*, aliam si ea justo *parcior*, et iterum aliam si ea justo *profusior* fuerit.

a) In haemorrhagia moderata nihil amplius suscipiendum, solet enim hujus conditionis profluvium sanguinis tandiu solum durare, quamdiu status morbi exigit.

b) Si haemorrhagia justo parciore foret, ea promovenda est, quod optime fomentationibus tepidis organi adfecti sit; nunquam attamen licet promovere haemorrhagiam in organo aliquo nobili, quae semper periculi plena est, sed evacuatio sanguinis, si quae necessaria foret, instituitur potius venae sectione aut adhibitis hirudinibus in plaga aliqua a loco affectionis remota; salutaris hoc in casu erit etiam usus purgantium antiphlogisticorum: cremonis tartari, arcani duplicati etc. item epispasticorum extremitatibus, quae tunc vi antagonismi ut plurimum in statu anaemico versantur, applicandorum, uti: sinapismi, corticis Mezeriei, balneorum acrimae etc.; usus emeticorum periculo non caret, eum purgantia antiphlogistica etiam plane superfluum reddunt.

c) Si haemorrhagia esset justo profusior, ea quoque sistenda est: hunc in finem aegro interne dabimus: acida mineralia fortiora, uti phosphoricum, muriaticum, sulfuricum, elixirium acidum Halleri, praeterea cauta manu adstringentia et roborantia, uti: gummi Kino, Catechu, corticem quercus, Chinae, folia rosae rubrae, radicem tormentillae, ratanhia, alumen, praeparata Ferri; in auxilium vocabimus, si adjuncta loci admiserint, etiam compressionem mechanicam vasis, e quo sanguis manat epithemata frigida, et fomentationes cum solutione acetatis plumbici, aquae vulnerariae Thedeni.

Singulari ratione in sistenda haemoptoe agit notabilis quantitas salis culinaris in ventriculum ingesti, in haematemesi frigus scroto applicitum, in metrorrhagia secale cornutum et cinnamomum.

In haemorrhagiis *passivis* illico exsurgit necessitas eas sopiendi, id quod praestare conabimur remediis, quae in haemorrhagiis activis profusis jam commemoravimus.

Haemorrhagiae, quae febris intermittens larvam

constituit, opponemus praeparata Chinae, aliaque, quibus secus febres intermittentes vincuntur.

Durante haemorrhagia lipothymiae et convulsiones nonnunquam evenientes promptam exigunt medicinam: illis occurrimus res intense odoras, uti aethere aceticum, spiritum cornu cervi, fumum plumae accensae etc. naribus admovendo; his vero, per opium, aquam laurocerasi, castoreum, vel, si convulsiones ab anaemia dependent, per therapiam mox in cura anaemiae adferendam.

Post sopitum insultum haemorrhagicum saepe residua anaemia cum erethismo, et nisus in recidivas peculiari cura digna sunt. — In anaemia prosunt initio lichen islandicum, quassia, trifolium fibrinum, serius vero Chinacea et Martialia et his similia vegetationi faventia, —

Nisus haemorrhagiarum in recidivas passim solventibus et roborantibus impugnandus est; solet enim is maxima ex parte dependere a necdum sublatis causis ipsarum praegressarum haemorrhagiarum, quas consistere diximus ut plurimum in plethora, congestionibus localibus, infarctibus viscerum, et diversis dyscrasiis sanguinis cum tempore in omnibus fluidis proclivitatem in dissolutionem, in solido mollibus vero laxitatem producentibus; atque in his malis sanandis utilem praestant operam remedia e classe diversimode solventium et roborantium, ut id specialis horum morborum Therapia docebit.

---

## Theses.

1. Haemorrhagiis semper aliae aliquae affectiones morbosae subsunt.
2. Auscultationis et percussionis eximia inutilitas etiam in eo casu, dum medio earum morbi quoque insanabiles cognoscuntur.
3. Vis naturae medicatrix et diaeta congrua multis morbis sanandis sufficiunt.
4. Multa, praecipue sic dicta sangvinem depurantia remedia debito aquae frigidae usu suppleri possunt.
5. Medicus nequaquam venenis utitur.
6. Non datur aliud nutrimentum, quod infanti ita proficuum esset, ut lac sanae matris.
7. Per Anatomiam pathologicam Diagnôsis morborum multum perficitur.
8. Unica existit syphilis, distinctioque ejus in blenorrhoeicam et canerosam non fundatur in essentia rei.
9. Febris intermittens fundatur in affectione nervosa.
10. In typho primaria affectio sita est in irritatione membranae mucosae.
11. Non semper, dum sanguis e vasis egreditur, laesio continuitatis vasorum adest.